

Frau am Fänschter

Si sitzt am Fänschter und ghört scho drzue
Wie dr Rahme und d Schprüfung in dr Schiibe
Und d Kind uff em Schuelwäg, die sagere grüezi
Und meine, s wurd immer so blibe

Si sitzt am Fänschter und kennt s ganze Dorf
Und weiss fasch vo alle, was si mache
Und wemme si frogt, wie goht s, seit si
Immer gliich schlächt und tuet lut uuselache

Si sitzt am Fänschter sit Johr und Johrzähnt
Und wartet, wenne rägnet, uff d Sunne
Und wenn si schiint, nimmt si d Krugge und lauft
Geduldig zum Bangg vor em Brunne

Si sitzt am Fänschter und ghört scho drzue
Wie dr Rahme und d Vorhäng drhinter
Mit Vergrösserigsglas list si langsam e Brief
Ihri Fründin het Angscht vor em Winter